

JAMMIN BRASS TABATA IMPRESIONANTE DEN CONCURSO

ORANJESTAD(AAN)— Cuatro brassband so a tuma parti den e concurso di Brassband den Lago Sport Park Diahuebs anochi.

Un publico di por lo menos 3000 hende a presencia e concurso aki y apesar cu ta cuatro agrupacion a tuma parti, nan por a goza di un show bunita.

Blues Brass di Savaneta a habri e concurso, dunando un bon actuacion y cu sonido masha aceptabel.

Blues Brass a haci formacion di strea, di kring y varios figura mas y a presenta tur na preto.

E uniform di e grupo mas bien tabata imitacion ci Blues Brothers, flus preto, handschoen blanco, sombre preto y cu nan bril na cara. E grupo aki mescos cu a pasa cu e habridor di concurso aña pasa a actua den centro di tereno bastante aleha di e publico.

Moondogs brassband a presenta seguidamente cu nan mascot (un persona



JAMMIN BRASS

disfrazado como cacho) dilanti. E grupo aki tambe a duna bon presentacion, y por a nota cu nan a impresionar mas cu Blues Brass.

Moondogs tambe a haci algun formacion, y nan tabata tin un ritmo poco diferente di e prome agrupacion.

Uniform di Moondogs tabata carson blanco, flanel preto manga largo cu nan emblema den dje, handschoen blanco bisti y



ROYAL STAR BRASS BAND

cu petchi blanco estilo La Serie.

E tercer agrupacion cu a presenta tabata Royal Star Brassband cu 40 integrante y cu 19 instrumento di blaas (brass). E grupo aki sinembargo no a haci uso maximo di e sonido di brass, mientras cu nan parti di drums si tabata fuerte

Nan a presenta tur na blanco cu nan nomber scirbi ariba nan camisa. E figuranan principal di e grupo aki tabata e brass pero nan

no a impone pa surpasa Blues Brass ni Moondogs.

E ultimo grupo tabata Jammin Brass, campeonnan 1981. For di momento cu e grupo aki a sali, e publico a basha bin dilanti subi tereno dunando polisan dolor di cabez pa por a mantene e publico aleha di e grupo.

Meimei di tereno, cu e publico den un circulo rond di e grupo, Jammin Brass a duna un show impresionante. Tabata un show cu a muestra cu ta nan indudablemente lo termina como campeon atrobe. Nan coordinacion tabata excelente y e musica cu nan a presenta cu shownan special di brass y di drum-

mernan a sobresali. Tabata tin hasta hende cu a comenta cu e show di Jammin Brass ta mas profesional cu di e profesional nan-mes.

E uniform di Jammin Brass tambe tabata un preciosidad. Nan a presenta cu keds blanco, mea blanco te bao di rudia, Carson biña estilo bermuda te na rudia cu strepi blanco na banda, camisa blanco cu su randnan biña y petchi preto cu pluma blanco ariba dje.

Jammin Brass na satisfaccion di tur hende a gana e concurso, cu Moondogs na segundo lugar y Blues Brass na tercer puesto.

E competencia di e anochi tabata mas bien entre Blues Brass y Moondogs. Royal Star Brassband, apesar di no a gana ta e brass band pa tene cuenta cune otro aña. Nan a acepta e decision di jurad masha deportivo.

E jurado a consisti di Sres. Arnold Beyde, Sam Hodge, Joy Kock y Ebby Peterson, mientras cu Norman Hart tabata presidente di jurado sin derecho di vota.



MOONDOGS BRASS BAND



BLUES BRASS